



*Senin, 15 Pebruari 2021*

**Ogen: Jeremia 46:13-26**



**Penampat Si La Ergegeh**



Penampat, seh kal kita perluna ibas geluh enda. Singataken maka labo kita ngasup ndalani geluh sisada dengen labo kita ngasup ndungi kerina dahin ntah pe persoalen adi la kin lit sinampatisa. Emaka kuan-kuan 'Ma Karondu la man sampaten' megati ibelas-belasken, sinuriken maka tuhu-tuhu kal kita perlu penampat. Lit kita si man sampaten, lit sinampati. Umumna sinampati gegehen asangken si man sampaten, ibas bidangna, kuga adi si nampati e labo lit gegehna? Tentuna reh cedana, reh belinna siman tangkelen.

Bagenda me rikutken renungenta wari enda, kerna bangsa Israel, si ndube erpengakap maka banci ia isampati raja Mesir. Tapi kepeken Mesir pe lanai ergegeh, reh raja Nebukadneser i Babil nari nerang bangsa enda, talu me ia, kota-kotana kernep, raja-rajana kerina ilegi dengen iendesken man Nebukadneser. Bageme Dibata mbuka perukuren bangsaNa, labo lit gegeh bangsa doni enda guna nampati ia, ula kal ernalem man bangsa-bangsa sideban seakaten Dibata. Sabab banci ipekeke Dibata gegeh bangsa sideban guna ncidahkan kuasaNa simbelin.

Banci sirenungken, kuga kalak si mindo penampat man kalak silabo ergegeh, labo ngasup nampati ntah mulahi ia ibas persoalenna. Kalak sibage banci ikataken tuhu-tuhu kal enggo bene ukurna, kuja pa pe itendengina. Janah lupa ia ulu penampat situhu-tuhu ibas kegeluhenna.

Erlajar arah geluh bangsa enda, iajuk kita guna nandai dirinta, meteh persoalen ras perbebenta janah sieteh ras tandai ise singasup nampati kita. Ula kal ernalem man doni enda, apai ka kalak si labo lit gegehna. Bagi nina KEE No. 195, *ise nge ndia banci sinampatisa, latih idoni ukur gulut mesera, mari dahi IA kam silatih ras beraten, adi ras Yesus bene me kiniseran*. Jesus nge ngenca penampat situhu-tuhu, mari dahi IA.

